



Broj: 01-50-1-15-21/24

Sarajevo, 28. 8. 2024.

| | | | |
|------------------------|-----------------------|------------|--------------|
| PRIMLJENO: 12-09-2024 | | | |
| Organizaciona jedinica | Klasifikaciona oznaka | Redni broj | Broj priloga |
| | | | |

ZAPISNIK

21. sjednice Predstavničkog doma

Parlamentarne skupštine Bosne i Hercegovine, održane 28. 8. 2024.

Sjednica je počela u 12.21 sati. Prisustvovao je 41 poslanik.

Odsustvovao je Predrag Kožul.

Sjednici su prisustvovali: predsjedavajuća Vijeća ministara BiH Borjana Krišto, zamjenik ministra pravde BiH Elvir Mahmuzić, zamjenica ministra za ljudska prava i izbjeglice BiH Duška Jurišić, zamjenik ministra vanjskih poslova BiH Josip Brkić, te predstavnici: Agencije za zaštitu ličnih podataka u BiH, Ureda za razmatranje žalbi BiH, Centralne izborne komisije BiH i Institucije ombudsmena za ljudska prava BiH.

Iz međunarodnih organizacija sjednicu su pratili predstavnici Vijeća Evrope.

Predsjedavajući je rekao da će, u skladu s članom 167. Poslovnika, na početku sjednice, prije rasprave o dnevnom redu, poslanicima biti omogućeno postavljanje poslaničkih pitanja u usmenoj formi.

U skladu s članom 168. Poslovnika, najavu za postavljanje poslaničkog pitanja u usmenoj formi dostavili su:

- Šemsudin Mehmedović -- ministru pravde BiH,
- Jasmin Emrić -- ministru komunikacija i prometa BiH,
- Jasmin Imamović -- ministrici civilnih poslova BiH i
- Mladen Bosić -- ministru vanjske trgovine i ekonomskih odnosa BiH.

Najave su, u skladu s članom 168. stav (2) Poslovnika, dostavljene predsjedavajućoj Vijeća ministara BiH i onom članu Vijeća ministara BiH na kojeg se pitanje odnosi. Predsjedavajući je podsjetio na to da je osiguran i direktan TV-prijenos ovog dijela sjednice u skladu s članom 167. stav (1) Poslovnika.

Sadržaj postavljenih pitanja je sljedeći: ¹

¹ Sadržaj pitanja preuzet je iz neautoriziranog transkripta 21. sjednice Predstavničkog doma.

Šemsudin Mehmedović

„Ja sam naslovio postavljanje usmenog zastupničkog pitanja ministru pravde, gospodinu Bunozi, a iskreno mogao sam to postaviti pitanje bilo kojem ministru iz sastava Vijeća ministara. Naime, konkretno u Ministarstvu pravde BiH na dan 31.12.2023. bio je zaposlen isti broj Hrvata i Bošnjaka, po 62, odnosno 37,12%. To su zvanični podaci iz odgovora Ministarstva koji je 15. 2. 2024, dostavljenog Sekretarijatu PSBiH. Struktura zaposlenih u Ministarstvu je suprotna članu 7. Zakona o Upravi kojim je utvrđeno slijedeće – U organima Uprave osigurava se odgovarajuća nacionalna zastupljenost državnih službenika i zaposlenika u skladu s nacionalnim strukturom stanovništva, a prema posljednjem popisu stanovništva u BiH. Preciznije, Bošnjaka je 22 manje, a Hrvata je više za 36 pozicija, odnosno za 140% od zakonom utvrđenog broja. I Srba je zaposleno manje za 11 pozicija, a iz reda ostalih 6 manje. Nesporno je da je ovakvo stanje rezultat dugogodišnjeg rada konkursnih komisija koje imenuje ministar pravde i direktor Agencije za državnu službu, kao i da se u komisije imenuju isključivo podobni i poslušni pojedinci. Ministar je kao rukovodilac institucije dužan provoditi i poštovati Ustav i zakone BiH, kao i Odluku Ustavnog suda o proporcionalnoj zastupljenosti konstitutivnih naroda u institucijama BiH, pogotovo ministar pravde treba da promovira pravdu i pravo na jednakost. Pitanje za ministra pravde BiH Davora Bunoza glasi: Koji su razlozi da je nacionalna struktura zaposlenih u Ministarstvu pravde BiH protivna članu 7. Zakona o Upravi i principu proporcionalne zastupljenosti konstitutivnih naroda u institucijama BiH, te šta ministar namjerava preduzeti da se otkloni značajan debalans Bošnjaka, Srba i ostalih?“

Zamjenik ministra pravde BiH Elvir Mahmuzić rekao je da će odgovor na pitanje biti dostavljen u pisanoj formi. Poslanik Šemsudin Mehmedović dao je komentar.

Jasmin Emrić

„Članom 6. Pravilnika o registriranju vozila određeno je da se registriranje vozila prvi put u BiH vrši na način da se vlasništvo nad vozilom dokazuje računom o prodaji vozila izdatim na ime kupca vozila ili kupoprodajni ugovor ili darovni ugovor, ili zapisnik u licitaciji, ili neki drugi valjan dokaz kojim se dokazuje vlasništvo. Dakle, Pravilnikom o registriranju vozila nije određeno da kupoprodajni ugovor kojim se dokazuje vlasništvo nad vozilom mora biti ovjeren od nadležnog organa zemlje izvoznice, niti je određeno da takav kupoprodajni ugovor mora biti notarski obrađen u zemlji izvoznici. Međutim, u praksi nakon uvoza vozila u BiH i završenog postupka carinjenja, prilikom registriranja vozila Ministarstvo unutrašnjih poslova Unsko-sanskog kantona traži da kupoprodajni ugovor zaključen između prodavca i kupca u zemlji izvoznici bude ovjeren od nadležnog organa ili notarski obrađen. S obzirom na to da se u većini zemalja izvoznica kupoprodajni ugovor zaključen između prodavca i kupca ne ovjerava niti se notarski obrađuje, to kupci s područja Unsko-sanskog kantona zbog stava Ministarstva unutrašnjih poslova tog Kantona ne mogu završiti postupak registracije uveženog vozila već registraciju moraju završavati u nekom drugom kantonu ili nekoj općini u entitetu Republika Srpska koji ne traže ovjeru kupoprodajnog ugovora od nadležnog organa zemlje izvoznice. Kako bih razriješili ovu neujednačenu primjenu Pravilnika o registriranju vozila od strane Ministarstva unutrašnjih poslova Unsko-sanskog kantona, postavljam pitanje ministru komunikacija i prometa BiH koje glasi: Da li kupoprodajni ugovor koji kupac zaključi sa

prodavcem polovnog vozila u inozemstvu mora ovjeriti nadležni organ te države, odnosno da li je ispravan stav Ministarstva unutrašnjih poslova Unsko-sanskog kantona kod primjene Pravilnika o registriranju vozila da je prihvatanje kupoprodajnih ugovora iz inozemstva koje nisu ovjerali nadležni organi zemlje izvoznice nezakonito postupanje?“

S obzirom na to da sjednici nije prisustvovao ministar komunikacija i prometa BiH Edin Forto, poslanik Jasmin Emrić zatražio je da se odgovor dostavi u pisanoj formi.

Jasmin Imamović

„Svima nam je jasno da je kulturno naslijeđe važan faktor razvoja i kvaliteta života građana. Najbolji primjer pravilnog korištenja kulturnog naslijeđa u funkciji ekonomskog rasta su Austrija i Italija, Turska, Španija, Francuska i druge turističke velesile. Posljedica nekadašnjih okupacija BiH, ali i nelegalnog iskopavanja, nelegalne trgovine i nelegalnog iznošenja važnih artefakata iz BiH jeste da su u nekim muzejima drugih država izloženi, a u nekim nisu ni izloženi važni artefakti za naše kulturno naslijeđe. S druge strane svjedoci smo vraćanja u zemlje porijekla mnogih artefakata od strane nekadašnjih kolonijalnih sila poput Holandije, Francuske i drugih. Vremenski raspon naših, bosanskohercegovačkih artefakata kreće se od prahistorije. Primjer su čuvena glasinaka kolica koja se nalaze u muzeju u Beču u Austriji. Ili originalni prijepis Povelje Kulina Bana, koji je u Sankt Petersburgu u Rusiji. Ili Zbirka orijentalnih rukopisa Safet-bega Bašagića koja je u Bratislavi u Slovačkoj. Znači, znamo da ima značajnih likovnih djela novijeg datuma koje treba vratiti u BiH. Ovo su neke od najpoznatijih kulturnih dragocjenosti BiH, ali ima i mnogo artefakata koji su u fundusima neizloženi u stranim muzejima jer njima ne trebaju, a nama zaista trebaju. Za njih nisu, a za nas jesu dragocjeni. Osim toga, mi smo i danas izloženi nelegalnom iskopavanju artefakata pomoći detektora za metal i njihovim nelegalnim prodajama. Moje pitanje glasi – Šta BiH radi na popisu ovih i sličnih dobara? Da li postoji strategija njihovog vraćanja u zemlju porijekla? I šta država čini da se obespravi i spriječi svakodnevno iznošenje artefakata pronađenih nelegalnim arheološkim iskopavanjima?“

S obzirom na to da sjednici nije prisustvovala ministrica civilnih poslova BiH Dubravka Bošnjak, potrebno je da se odgovor dostavi u pisanoj formi.

Mladen Bosić

„Mogu da konstatujem da nijedan ministar kome je postavljeno pitanje nije se pojavio na ovoj sjednici i da je to manje-više postalo praksa i molim Vas da vi kao Kolegij koji je između ostalog zadužen da obezbijedi dignitet ovog doma intervenišete kod Savjeta ministara da se obezbijede promptniji odgovori, odnosno prisustvo ministara. Znači, ja nakon što sam dobio odgovor na prethodno postavljeno poslaničko pitanje oko posjete Ministarstva spoljne trgovine i ekonomskih odnosa Panami 2022. godine i u odgovoru je utvrđeno da nijedan bilateralni sporazum sa Panomom nije potpisan, da je razmjena sa Panamom u prvom dijelu ove godine bila nešto oko 200.000,00 KM i da je u suštini sastanak odnosno posjetu organizovao Fatih Kol koji je osumnjičen za pripadanje narko kartelu, postavljam sljedeće

pitanje: Koliko je koštala avionska karta, a koliko su iznosili ostali troškovi posjete Delegacije Ministarstva spoljnje trgovine i ekonomskih odnosa Republici Panami 2022. godine? Ko je sačinjavao delegaciju, kao i koliko je dana trajala posjeta? Koliko sam shvatio, nema niko ko je ovlašten da da odgovor na ovo pitanje, predsjedavajući?“

S obzirom na to da sjednici nije prisustvovao ministar vanjske trgovine i ekonomskih odnosa BiH Staša Košarac, potrebno je da se odgovor dostavi u pisanoj formi.

* * * * *

Predsjedavajući je, povodom utvrđivanja dnevnog reda, rekao sljedeće:

- **Tačka 16.** Izvještaj o radu Vijeća ministara BiH za 2023. godinu, broj: 01,02-50-18-1414/24 od 19. 7. 2024, skinuta je s dnevnog reda zbog nedostatka mišljenja komisija.

S ranijeg dnevnog reda, na zahtjev Zajedničke komisije za ljudska prava, skinuta je:

- **Tačka 17.** Izvještaj o realizaciji Revidirane strategije za provođenje Aneksa VII. Dejtonskog mirovnog sporazuma u Bosni i Hercegovini za 2022. godinu, podnosilac: Ministarstvo za ljudska prava i izbjeglice BiH, broj: 01,02-41-1415/24 od 19. 7. 2024.

S dnevnog reda skinuta je i tačka 22. Poslanička inicijativa Mije Karamehić-Abazović i Ljubice Miljanović za donošenje Zakona o izradi obaveznih sekundarnih preventivnih programa za rano otkrivanje nezaraznih bolesti u Bosni Hercegovini i za donošenje Odluke o uspostavljanju ekspertskog tima za izradu sekundarnih preventivnih programa za rano otkrivanje nezaraznih bolesti u Bosni Hercegovini, broj: 01-50-1-1331/24 od 9. 7. 2024, s obzirom na to da je poslanica Ljubica Miljanović povukla svoj potpis s navedene inicijative, te da iz tog razloga Zajednička komisija za ljudska prava nije razmatrala inicijativu.

Izmijenjene su:

- **Tačka 3.** Prijedlog zakona o dopuni Izbornog zakona Bosne i Hercegovine, predlagач: poslanici iz Kluba SDA: Amor Mašović, Safet Kešo, Denijal Tulumović, Šemsudin Dedić, Edin Ramić, Nermin Mandra, Midhat Čaušević, Šerif Špago, broj: 01-02-1-709/24 od 2. 4. 2024, s Mišljenjem Ustavnopravne komisije, koje je negativno;
- **Tačka 4.** Prijedlog zakona o dopuni Izbornog zakona Bosne i Hercegovine, predlagач: poslanik Šemsudin Mehmedović, broj: 01-02-1-749/24 od 5. 4. 2024, s Mišljenjem Ustavnopravne komisije, koje je negativno po drugi put.

U raspravi o dnevnom redu učestvovali su Mia Karamehić-Abazović i Šemsudin Mehmedović.

Mia Karamehić-Abazović diskutirala je o razlozima skidanja s dnevnog reda tačke: Poslanička inicijativa Mije Karamehić-Abazović i Ljubice Miljanović za donošenje zakona o izradi obaveznih sekundarnih preventivnih programa za rano otkrivanje nezaraznih bolesti u Bosni Hercegovini i za donošenje odluke o uspostavljanju ekspertnog tima za izradu sekundarnih preventivnih programa za rano otkrivanje nezaraznih bolesti u Bosni Hercegovini.

Šemsudin Mehmedović predložio je dopunu dnevnog reda tačkom: Radnopravni status Zorana Galića, zamjenika direktora Državne agencije za istrage i zaštitu BiH, za kojim je Sud BiH raspisao međunarodnu potjernicu.

Predsjedavajući je konstatirao da ne postoji poslovnička mogućnost da se navedena tačka uvrsti u dnevni red, te se Dom nije ni izjašnjavao o ovom prijedlogu za dopunu dnevnog reda.

Predsjedavajući je konstatirao da 21. sjednica Predstavničkog doma ima sljedeći

DNEVNI RED

1. Usvajanje zapisnika 20. sjednice i 14. hitne sjednice Predstavničkog doma Parlamentarne skupštine BiH;
2. Komentari na dobivene odgovore na poslanička pitanja;
3. Prijedlog zakona o dopuni Izbornog zakona Bosne i Hercegovine, predlagač: poslanici Kluba SDA: Amor Mašović, Safet Kešo, Denijal Tulumović, Šemsudin Dedić, Edin Ramić, Nermin Mandra, Midhat Čaušević, Šerif Špago, broj: 01-02-1-709/24 od 2. 4. 2024, s Mišljenjem Ustavnopravne komisije;
4. Prijedlog zakona o dopuni Izbornog zakona Bosne i Hercegovine, predlagač: poslanik Šemsudin Mehmedović, broj: 01-02-1-749/24 od 5. 4. 2024, s Mišljenjem Ustavnopravne komisije;
5. Izvještaj komisije Kolegija o nastojanju za postizanje saglasnosti o Prijedlogu zakona o dopunama Zakona o plaćama i drugim naknadama u sudskim i tužilačkim institucijama na nivou Bosne i Hercegovine, predlagač: Vijeće ministara BiH, broj: 01,02-02-1-649/24 od 22. 7. 2024, skraćeni postupak (zakon u prvom čitanju);
6. Izvještaj komisije Kolegija o nastojanju za postizanje saglasnosti o prijedlogu da se Prijedlog zakona o dopunama Krivičnog zakona Bosne i Hercegovine, predlagač: poslanik Nihad Omerović, razmatra po skraćenom postupku, broj: 01-02-1-1166/24 od 22. 7. 2024;
7. Izvještaj komisije Kolegija o nastojanju za postizanje saglasnosti o Izvještaju o pregledanom stanju finansijskog poslovanja političkih stranaka u 2021. godini, podnosilac: Centralna izborna komisija BiH, broj: 01,02-07-4-1183/24 od 22. 7. 2024;
8. Izvještaj komisije Kolegija o nastojanju za postizanje saglasnosti o prijedlogu zaključaka iz Izvještaja o provođenju javnog saslušanja predstavnika Ministarstva komunikacija i prometa Bosne i Hercegovine, podnosilac: Komisija za borbu protiv korupcije Predstavničkog doma, broj: 01/8-50-3-978/24 od 22. 7. 2024;
9. Izvještaj komisije Kolegija o nastojanju za postizanje saglasnosti o Izvještaju o provođenju javnog saslušanja predstavnika Ministarstva komunikacija i prometa Bosne i Hercegovine,

podnosilac: Komisija za borbu protiv korupcije Predstavničkog doma Parlamentarne skupštine BiH, broj: 01/8-50-3-978/24 od 22. 7. 2024;

10. Izvještaj komisije Kolegija o nastojanju za postizanje saglasnosti o prijedlogu zaključaka iz Izvještaja o provođenju javnog saslušanja predstavnika Instituta za mjeriteljstvo Bosne i Hercegovine i Vijeća za mjeriteljstvo Bosne i Hercegovine, a u vezi s donošenjem novih podzakonskih akata, podnosilac: Komisija za borbu protiv korupcije Predstavničkog doma, broj: 01/8-50-3-979/24 od 22. 7. 2024;
11. Izvještaj komisije Kolegija o nastojanju za postizanje saglasnosti o Izvještaju o provođenju javnog saslušanja predstavnika Instituta za mjeriteljstvo Bosne i Hercegovine i Vijeća za mjeriteljstvo Bosne i Hercegovine, a u vezi s donošenjem novih podzakonskih akata, podnosilac: Komisija za borbu protiv korupcije Predstavničkog doma Parlamentarne skupštine BiH, broj: 01/8-50-3-979/24 od 22. 7. 2024;
12. Izvještaj komisije Kolegija o nastojanju za postizanje saglasnosti o poslaničkoj inicijativi Sabine Čudić kojom se zadužuje Ministarstvo odbrane BiH da, u roku od 30 dana od usvajanja ove inicijative, donese izmjene ili dopune člana 5. Pravilnika o uniformama Oružanih snaga Bosne i Hercegovine („Službeni glasnik BiH“, broj 44/17) i tako omogućiti nošenje hidžaba, kao vjerskog obilježja, pripadnicama Oružanih snaga Bosne i Hercegovine, broj: 01-50-1-1021/24 od 22. 7. 2024;
13. Izvještaj komisije Kolegija o nastojanju za postizanje saglasnosti o poslaničkoj inicijativi Denisa Zvizdića kojom Predstavnički dom Parlamentarne skupštine BiH inicira da Ministarstvo civilnih poslova BiH pokrene proceduru zaključivanja Sporazuma o dvojnomo državljanstvu između Bosne i Hercegovine i Savezne Republike Njemačke, broj: 01-50-1-1229/24 od 22. 7. 2024;
14. Materijali Upravnog odbora BHRT-a:
 - a) Izvještaj o finansijskom poslovanju i Programski izvještaj BHRT-a za 2023. godinu,
 - b) Programski plan i Finansijski plan BHRT-a za 2024. godinu, broj: 01,02-50-18-921/24 od 9. 5. 2024;
15. Izvještaj o zaštiti ličnih podataka u Bosni i Hercegovini za 2023. godinu, podnosilac: Agencija za zaštitu ličnih podataka u BiH, broj: 01,02-04-1-1345/24 od 10. 7. 2024;
16. Specijalni izvještaj o stanju u prostorijama za zadržavanje u pojedinim policijskim upravama u Bosni i Hercegovini, podnosilac: Institucija ombudsmena za ljudska prava BiH, broj: 01,02-12-1-1423/24 od 22. 7. 2024;
17. Izvještaj o radu Ureda za razmatranje žalbi BiH za 2023. godinu, broj: 01,02-50-17-1437/24 od 23. 7. 2024;
18. Izvještaj o provođenju zakona iz nadležnosti Centralne izborne komisije Bosne i Hercegovine u 2023. godini, podnosilac: Centralna izborna komisija BiH, broj: 01,02-07-4-1497/24 od 30.7. 2024;
19. Prvi periodični izvještaj o uvođenju novih tehnologija u izborni proces u Bosni i Hercegovini, podnosilac: Centralna izborna komisija BiH, broj: 01,02-50-18-1498/24 od 30. 7. 2024;
20. Davanje saglasnosti za ratifikaciju Sporazuma između Republike Srbije i Bosne i Hercegovine za IPA III Program prekogranične saradnje „Srbija – Bosna i Hercegovina“ za period 2021-2027. godine, broj: 01,02-21-1-1448/24 od 25. 7. 2024;

21. Davanje saglasnosti za ratifikaciju Sporazuma o finansiranju za Interreg IV-B IPA Program za dunavsku regiju za period 2021-2027. godina između Evropske unije, Bosne i Hercegovine i Mađarske, broj: 01,02-21-1-1449/24 od 25. 7. 2024;
22. Davanje saglasnosti za ratifikaciju Međunarodnog sporazuma između Evropske unije, s jedne strane, i Bosne i Hercegovine, s druge strane, o učešću Bosne i Hercegovine u programu Unije Digitalna Evropa (2021-2027), broj: 01,02-21-1-1544/24 od 7. 8. 2024.

Ad.1. Usvajanje zapisnika 20. sjednice i 14. hitne sjednice Predstavničkog doma Parlamentarne skupštine BiH

Predsjedavajući je dao uvodne napomene. Nije bilo rasprave.

Zapisnik 20. sjednice Predstavničkog doma usvojen je s 33 glasa „za“ (iz Federacije BiH 22, iz Republike Srpske 11), jednim „protiv“ i bez glasova „suzdržan“.

Zapisnik 14. hitne sjednice Predstavničkog doma usvojen je s 34 glasa „za“ (iz Federacije BiH 22, iz Republike Srpske 12), jednim „protiv“ i bez glasova „suzdržan“.

Ad.2. Komentari na dobivene odgovore na poslanička pitanja

Predsjedavajući je rekao da su, u skladu s članom 170. Poslovnika, do ove sjednice Predstavničkog doma pitanja u pisanoj formi postavili poslanici:

- Šemsudin Mehmedović – postavio šest pitanja i zatražio upućivanje urgencije za dostavljanje odgovora na pitanja,
- Saša Magazinović – postavio dva pitanja,
- Šemsudin Dedić – postavio dva pitanja,
- Ermina Salkičević - Dizdarević – postavila jedno pitanje,
- Aida Baručija – postavila jedno pitanje,
- Albin Muslić – postavio jedno pitanje,
- Jasmin Emrić – postavio jedno pitanje,
- Rejhana Dervišević – zatražila upućivanje urgencije za dostavljanje odgovora na tri pitanja,
- Milan Dunović - postavio jedno pitanje i zatražio upućivanje urgencije za dostavljanje odgovora na pitanja.

Do današnje sjednice dostavljeni su sljedeći odgovori:

- na pitanja Šemsudina Mehmedovića dostavljeno je 45 odgovora;
- na pitanja Aide Baručije dostavljeno je 26 odgovora;

- na pitanja Saše Magazinovića dostavljena su tri odgovora;
- na pitanja Rejhane Dervišević dostavljena su dva odgovora;
- na pitanja Jasmina Emrića dostavljena su dva odgovora;
- po jedan odgovor dostavljen je na pitanja: Denisa Zvizdića, Sanje Vulić, Albina Muslića, Safeta Keše, Mladena Bosića, Slavka Matića i Nenada Grkovića, te obavještenje povodom pitanja Milana Dunovića.

Odgovore su komentirali: Milan Dunović, Šemsudin Mehmedović, Albin Muslić, Šerif Špago, Safet Kešo, Slavko Matić, Nenad Grković i Aida Baručija.

Ad. 3. Prijedlog zakona o dopuni Izbornog zakona Bosne i Hercegovine, predlagač: poslanici Kluba SDA: Amor Mašović, Safet Kešo, Denijal Tulumović, Šemsudin Dedić, Edin Ramić, Nermin Mandra, Midhat Čaušević, Šerif Špago, broj: 01-02-1-709/24 od 2. 4. 2024, s Mišljenjem Ustavnopravne komisije

Predsjedavajući je dao uvodne napomene.

U raspravi su učestvovali: Edin Ramić, Milorad Kojić, Safet Kešo i Darko Babalj.

„Za“ Mišljenje Ustavnopravne komisije o Prijedlogu zakona o dopuni Izbornog zakona Bosne i Hercegovine glasalo je 15 poslanika (iz Federacije BiH tri, iz Republike Srpske 12), „protiv“ 19, „suzdržan“ jedan. Predsjedavajući je konstatirao da Dom nije prihvatio Mišljenje Ustavnopravne komisije, te je Komisija zadužena, da u skladu s članom 113. stav (3) Poslovnika, sačini novo mišljenje o navedenom prijedlogu zakona.

Ad. 4. Prijedlog zakona o dopuni Izbornog zakona Bosne i Hercegovine, predlagač: poslanik Šemsudin Mehmedović, broj: 01-02-1-749/24 od 5. 4. 2024, s Mišljenjem Ustavnopravne komisije

Predsjedavajući je dao uvodne napomene. Šemsudin Mehmedović istakao je povredu Poslovnika.

Predsjedavajući je konstatirao da, s obzirom na to da je Ustavnopravna komisija po drugi put dala negativno mišljenje o Prijedlogu zakona o dopuni Izbornog zakona Bosne i Hercegovine, predlagača poslanika Šemsudina Mehmedovića, zakonodavna procedura po Prijedlogu zakona je obustavljena.

Ad. 5. Izvještaj komisije Kolegija o nastojanju za postizanje saglasnosti o Prijedlogu zakona o dopunama Zakona o plaćama i drugim naknadama u sudskim i tužilačkim institucijama na nivou Bosne i Hercegovine, predlađač: Vijeće ministara BiH, broj: 01,02-02-1-649/24 od 22. 7. 2024, skraćeni postupak (zakon u prvom čitanju)

Predsjedavajući je dao uvodne napomene. Nije bilo rasprave.

Nakon uvodnih napomena predsjedavajućeg, nije bilo rasprave jer je okončana na prethodnoj sjednici.

Predstavnički dom je, u drugom krugu glasanja, s 28 glasova „za“, bez glasova „protiv“ i sedam glasova „suzdržan“, usvojio Prijedlog zakona o dopunama Zakona o plaćama i drugim naknadama u sudskim i tužilačkim institucijama na nivou Bosne i Hercegovine u prvom čitanju.

Ad. 6. Izvještaj komisije Kolegija o nastojanju za postizanje saglasnosti o prijedlogu da se Prijedlog zakona o dopunama Krivičnog zakona Bosne i Hercegovine, predlađač: poslanik Nihad Omerović, razmatra po skraćenom postupku, broj: 01-02-1-1166/24 od 22. 7. 2024.

Nakon uvodnih napomena predsjedavajućeg nije bilo rasprave jer je okončana na prethodnoj sjednici.

Predstavnički dom, u drugom krugu glasanja, nije prihvatio prijedlog da se Prijedlog zakona o dopunama Krivičnog zakona Bosne i Hercegovine razmatra po skraćenom postupku. „Za“ je glasalo 20 poslanika, „protiv“ 15 (iz Federacije BiH tri, iz Republike Srpske 12), „suzdržanih“ nije bilo. Predsjedavajući je konstatirao da će se Prijedlog zakona o dopunama Krivičnog zakona Bosne i Hercegovine razmatrati u redovnom zakonodavnom postupku.

Ad. 7. Izvještaj komisije Kolegija o nastojanju za postizanje saglasnosti o Izvještaju o pregledanom stanju finansijskog poslovanja političkih stranaka u 2021. godini, podnosilac: Centralna izborna komisija BiH, broj: 01,02-07-4-1183/24 od 22. 7. 2024.

Nakon uvodnih napomena predsjedavajućeg nije bilo rasprave jer je okončana na prethodnoj sjednici.

Predstavnički dom, u drugom krugu glasanja, nije usvojio Izvještaj o pregledanom stanju finansijskog poslovanja političkih stranaka u 2021. godini. „Za“ je glasalo 19 poslanika, „protiv“ 12 (iz Republike Srpske), „suzdržana“ četiri.

Ad. 8. Izvještaj komisije Kolegija o nastojanju za postizanje saglasnosti o prijedlogu zaključaka iz Izvještaja o provođenju javnog saslušanja predstavnika Ministarstva komunikacija i prometa Bosne i Hercegovine, podnosilac: Komisija za borbu protiv korupcije Predstavničkog doma, broj: 01/8-50-3-978/24 od 22. 7. 2024.

Nakon uvodnih napomena predsjedavajućeg nije bilo rasprave jer je okončana na prethodnoj sjednici.

Predstavnički dom je, u drugom krugu glasanja, s 23 glasa „za“, 10 „protiv“ (iz Federacije BiH tri, iz Republike Srpske sedam) i dva glasa „suzdržan“, usvojio zaključke iz Izvještaja o provođenju javnog saslušanja predstavnika Ministarstva komunikacija i prometa Bosne i Hercegovine, koji glase:

1. "Predstavnički dom Parlamentarne skupštine BiH smatra da je neprihvatljivo da Ministarstvo komunikacija i prometa BiH nema funkcionalan upravni nadzor nad administrativnim stručnim organizacijama kao ni tačne i precizne podatke o prihodima stručnih organizacija za obavljanje administrativnih poslova i tehničkih pregleda koji se naplaćuju u skladu s Cjenovnikom usluga za provođenje homologacije.
2. Predstavnički dom Parlamentarne skupštine BiH traži od Vijeća ministara BiH da u roku od 90 dana uputi u parlamentarnu proceduru izmjene i dopune Zakona o osnovama sigurnosti saobraćaja na putevima u Bosni i Hercegovini, u smislu da se u članu 205. Zakona bolje razrade uslovi i kriteriji koje bi trebalo da ispunjavaju stručne organizacije za obavljanje povjerenih javnih poslova u oblasti homologacije.
3. U vezi sa zaključcima Predstavničkog doma Parlamentarne skupštine BiH sa 16. sjednice, održane 28. 2. 2024, usvojenim povodom rasprave o Izvještaju Ureda za reviziju institucija BiH o provedenoj reviziji učinka o temi: 'Povjereni javni poslovi iz nadležnosti institucija BiH - studija slučaja: Ministarstvo komunikacija i prometa BiH', Predstavnički dom Parlamentarne skupštine BiH dostavlja Tužilaštvu BiH Izvještaj Komisije za borbu protiv korupcije Predstavničkog doma Parlamentarne skupštine BiH o provođenju javnog saslušanja predstavnika Ministarstva komunikacija i prometa Bosne i Hercegovine, a u vezi s procesom homologacije vozila sa svim relevantnim finansijskim pokazateljima, kao i neautorizirani transkript s javnog saslušanja."

Ad. 9. Izvještaj komisije Kolegija o nastojanju za postizanje saglasnosti o Izvještaju o provođenju javnog saslušanja predstavnika Ministarstva komunikacija i prometa Bosne i Hercegovine, podnosilac: Komisija za borbu protiv korupcije Predstavničkog doma Parlamentarne skupštine BiH, broj: 01/8-50-3-978/24 od 22. 7. 2024.

Nakon uvodnih napomena predsjedavajućeg, nije bilo rasprave jer je okončana na prethodnoj sjednici.

Predstavnički dom je, u drugom krugu glasanja, s 22 glasa „za“, 13 „protiv“ (iz Federacije BiH šest, iz Republike Srpske sedam) i bez glasova „suzdržan“, usvojio Izvještaj o provođenju javnog saslušanja predstavnika Ministarstva komunikacija i prometa Bosne i Hercegovine.

Ad. 10. Izvještaj komisije Kolegija o nastojanju za postizanje saglasnosti o prijedlogu zaključaka iz Izvještaja o provođenju javnog saslušanja predstavnika Instituta za mjeriteljstvo Bosne i Hercegovine i Vijeća za mjeriteljstvo Bosne i Hercegovine, a u vezi s donošenjem novih podzakonskih akata, podnosilac: Komisija za borbu protiv korupcije Predstavničkog doma, broj: 01/8-50-3-979/24 od 22. 7. 2024.

Nakon uvodnih napomena predsjedavajućeg, nije bilo rasprave jer je okončana na prethodnoj sjednici.

Predstavnički dom je, u drugom krugu glasanja, s 25 glasova „za“, devet „protiv“ (iz Federacije BiH dva, iz Republike Srpske sedam) i jednim glasom „suzdržan“, usvojio zaključke iz Izvještaja o provođenju javnog saslušanja predstavnika Instituta za mjeriteljstvo Bosne i Hercegovine i Vijeća za mjeriteljstvo Bosne i Hercegovine, a u vezi s donošenjem novih podzakonskih akata, koji glase:

1. “Predstavnički dom Parlamentarne skupštine BiH smatra da je mjeriteljstvo ozbiljna oblast u kojoj postoji prevelika samostalnost u odlučivanju rukovodioca Instituta za mjeriteljstvo BiH te da nisu dovoljno uključene zakonom definirane institucije, posebno Vijeće za mjeriteljstvo BiH, i da je potrebna veća institucionalna kontrola, transparentnost, kao i učešće stručne javnosti.
2. Predstavnički dom Parlamentarne skupštine BiH traži od Vijeća ministara BiH da u roku od 90 dana uputi u parlamentarnu proceduru izmjene i dopune Zakona o mjeriteljstvu Bosne i Hercegovine u smislu da se preciznije definira uloga Vijeća za mjeriteljstvo BiH, razmotri zakonska mogućnost usklađivanja s najboljim praksama u okruženju i standardima EU kada je u pitanju mjerenje gledanosti i da veći značaj parlamentarnom nadzoru.
3. Predstavnički dom Parlamentarne skupštine BiH prosljeđuje relevantnim pravosudnim institucijama Izvještaj o provođenju javnog saslušanja predstavnika Instituta za mjeriteljstvo Bosne i Hercegovine i Vijeća za mjeriteljstvo Bosne i Hercegovine, a u vezi s donošenjem novih podzakonskih akata, kao i neautorizirani transkript.”

Ad. 11. Izvještaj komisije Kolegija o nastojanju za postizanje saglasnosti o Izvještaju o provođenju javnog saslušanja predstavnika Instituta za mjeriteljstvo Bosne i Hercegovine i Vijeća za mjeriteljstvo Bosne i Hercegovine, a u vezi s donošenjem novih podzakonskih akata, podnosilac: Komisija za borbu protiv korupcije Predstavničkog doma Parlamentarne skupštine BiH, broj: 01/8-50-3-979/24 od 22. 7. 2024.

Nakon uvodnih napomena predsjedavajućeg, nije bilo rasprave jer je okončana na prethodnoj sjednici.

Predstavnički dom je, u drugom krugu glasanja, s 25 glasova „za“, devet „protiv“ (iz Federacije BiH dva, iz Republike Srpske sedam) i jednim glasom „suzdržan“, usvojio Izvještaj o provođenju javnog saslušanja predstavnika Instituta za mjeriteljstvo Bosne i Hercegovine i Vijeća za mjeriteljstvo Bosne i Hercegovine, a u vezi s donošenjem novih podzakonskih akata.

Ad. 12. Izvještaj komisije Kolegija o nastojanju za postizanje saglasnosti o poslaničkoj inicijativi Sabine Ćudić kojom se zadužuje Ministarstvo odbrane BiH da, u roku od 30 dana od usvajanja ove inicijative, donese izmjene ili dopune člana 5. Pravilnika o uniformama Oružanih snaga Bosne i Hercegovine („Službeni glasnik BiH“, broj 44/17) i tako omogućiti nošenje hidžaba, kao vjerskog obilježja, pripadnicama Oružanih snaga Bosne i Hercegovine, broj: 01-50-1-1021/24 od 22. 7. 2024.

Nakon uvodnih napomena predsjedavajućeg, nije bilo rasprave jer je okončana na prethodnoj sjednici.

Predstavnički dom, u drugom krugu glasanja, nije prihvatio poslaničku inicijativu Sabine Ćudić. „Za“ je glasalo 20 poslanika, „protiv“ 15 (iz Federacije BiH tri, iz Republike Srpske 12), „suzdržanih“ nije bilo.

Ad. 13. Izvještaj komisije Kolegija o nastojanju za postizanje saglasnosti o poslaničkoj inicijativi Denisa Zvizdića kojom Predstavnički dom Parlamentarne skupštine BiH inicira da Ministarstvo civilnih poslova BiH pokrene proceduru zaključivanja Sporazuma o dvojnomo državljanstvu između Bosne i Hercegovine i Savezne Republike Njemačke, broj: 01-50-1-1229/24 od 22. 7. 2024.

Nakon uvodnih napomena predsjedavajućeg, nije bilo rasprave jer je okončana na prethodnoj sjednici.

Predstavnički dom je, u drugom krugu glasanja, s 25 glasova „za“, četiri „protiv“ (iz Republike Srpske) i šest glasova „suzdržan“, usvojio poslaničku inicijativu Denisa Zvizdića.

Ad. 14. Materijali Upravnog odbora BHRT-a:

- a) Izvještaj o finansijskom poslovanju i Programski izvještaj BHRT-a za 2023. godinu,**
- b) Programski plan i Finansijski plan BHRT-a za 2024. godinu, broj: 01,02-50-18-921/24 od 9. 5. 2024.**

Nakon uvodnih napomena predsjedavajućeg, u raspravi su učestvovali Jasmin Emrić i Šemsudin Mehmedović.

Šemsudin Mehmedović predložio je sljedeći zaključak: „Predstavnički dom Parlamentarne skupštine BiH predlaže Vladi Federacije BiH da hitno izmijeni član 29. stav 2. Zakona o izvršnom postupku Federacije Bosne i Hercegovine, na način da i račun za RTV taksu ili izvod iz poslovnih knjiga za cijenu RTV takse ima svojstvo vjerodostojne isprave, čime bi se omogućilo povećanje stepena naplate RTV takse u Federaciji BiH.“

„Za“ prijedlog zaključka glasalo je 20 poslanika (iz Federacije BiH), „protiv“ 14, „suzdržan“ jedan. Predsjedavajući je konstatirao da će Kolegij Predstavničkog doma kao komisija, zbog nedostatka entitetske većine u prvom krugu glasanja, obaviti naknadno usaglašavanje o navedenom prijedlogu zaključka poslanika Šemsudina Mehmedovića.

Za“ Izvještaj o finansijskom poslovanju BHRT-a za 2023. godinu glasala su 24 poslanika (iz Federacije BiH 23, iz Republike Srpske jedan), „protiv“ 11, „suzdržanih“ nije bilo. Predsjedavajući je konstatirao da će Kolegij Predstavničkog doma kao komisija, zbog nedostatka entitetske većine u prvom krugu glasanja, obaviti naknadno usaglašavanje o navedenom izvještaju.

Predsjedavajući je konstatirao da su Programski izvještaj BHRT-a za 2023. godinu, Programski plan i Finansijski plan za 2024. godinu primljeni k znanju.

Ad. 15. Izvještaj o zaštiti ličnih podataka u Bosni i Hercegovini za 2023. godinu, podnosilac: Agencija za zaštitu ličnih podataka u BiH, broj: 01,02-04-1-1345/24 od 10. 7. 2024.

Predsjedavajući je dao uvodne napomene. Diskutirao je Šerif Špago.

Izvještaj o zaštiti ličnih podataka u Bosni i Hercegovini za 2023. godinu usvojen je s 26 glasova „za“ (iz Federacije BiH 19, iz Republike Srpske sedam), pet „protiv“ i četiri glasa „suzdržan“.

Ad. 16. Specijalni izvještaj o stanju u prostorijama za zadržavanje u pojedinim policijskim upravama u Bosni i Hercegovini, podnosilac: Institucija ombudsmena za ljudska prava BiH, broj: 01,02-12-1-1423/24 od 22. 7. 2024.

Nakon uvodnih napomena predsjedavajućeg nije bilo rasprave.

Specijalni izvještaj o stanju u prostorijama za zadržavanje u pojedinim policijskim upravama u Bosni i Hercegovini usvojen je s 24 glasa „za“ (iz Federacije BiH 18, iz Republike Srpske šest), bez glasova „protiv“ i 11 glasova „suzdržan“.

Ad. 17. Izvještaj o radu Ureda za razmatranje žalbi BiH za 2023. godinu, broj: 01,02-50-17-1437/24 od 23. 7. 2024.

Nakon uvodnih napomena predsjedavajućeg nije bilo rasprave.

S 27 glasova „za“ (iz Federacije BiH 20, iz Republike Srpske sedam), šest „protiv“ i dva glasa „suzdržan“ usvojeni su zaključci iz Mišljenja Komisije za finansije i budžet koji glase:

1. Predstavnički dom Parlamentarne skupštine BiH sugerira Ministarstvu finansija i trezora BiH da odobri budžetski zahtjev Uredu za razmatranje žalbi BiH za 2025. godinu kako bi se, u skladu s Pravilnikom o unutrašnjoj organizaciji Ureda za razmatranje žalbi Bosne i Hercegovine, popunila radna mjesta i osigurao rad Ureda u punom kapacitetu.
2. Predstavnički dom Parlamentarne skupštine BiH traži od Ureda za razmatranje žalbi BiH da dodatno unaprijedi saradnju s Agencijom za javne nabavke BiH i Komisijom za finansije i budžet Predstavničkog doma, a sve s ciljem kvalitetnog rješavanja određenih pitanja iz oblasti javnih nabavki putem izmjena i dopuna važećeg Zakona o javnim nabavkama.

Izvještaj o radu Ureda za razmatranje žalbi BiH za 2023. godinu usvojen je s 28 glasova „za“ (iz Federacije BiH 21, iz Republike Srpske sedam), pet „protiv“ i dva glasa „suzdržan“.

Ad. 18. Izvještaj o provođenju zakona iz nadležnosti Centralne izborne komisije Bosne i Hercegovine u 2023. godini, podnosilac: Centralna izborna komisija BiH, broj: 01,02-07-4-1497/24 od 30.7. 2024.

Nakon uvodnih napomena predsjedavajućeg nije bilo rasprave.

„Za“ Izvještaj o provođenju zakona iz nadležnosti Centralne izborne komisije Bosne i Hercegovine u 2023. godini glasalo je 14 poslanika (iz Federacije BiH), deset „protiv“, 11 „suzdržanih“. Predsjedavajući je konstatirao da će Kolegij Predstavničkog doma kao komisija,

zbog nedostatka entitetske većine u prvom krugu glasanja, obaviti naknadno usaglašavanje o navedenom izvještaju.

Ad. 19. Prvi periodični izvještaj o uvođenju novih tehnologija u izborni proces u Bosni i Hercegovini, podnosilac: Centralna izborna komisija BiH, broj: 01,02-50-18-1498/24 od 30. 7. 2024.

Predsjedavajući je dao uvodne napomene. Nije bilo rasprave.

Prvi periodični izvještaj o uvođenju novih tehnologija u izborni proces u Bosni i Hercegovini usvojen je s 24 glasa „za“ (iz Federacije BiH 19, iz Republike Srpske pet), deset „protiv“ i jednim glasom „suzdržan“.

Ad. 20. Davanje saglasnosti za ratifikaciju Sporazuma između Republike Srbije i Bosne i Hercegovine za IPA III Program prekogranične saradnje „Srbija – Bosna i Hercegovina“ za period 2021-2027. godine, broj: 01,02-21-1-1448/24 od 25. 7. 2024.

Predsjedavajući je dao uvodne napomene. Nije bilo rasprave.

Predstavnički dom je, s 33 glasa „za“ (iz Federacije BiH 21, iz Republike Srpske 12), jednim „protiv“ i jednim glasom „suzdržan“, dao saglasnost za ratifikaciju Sporazuma između Republike Srbije i Bosne i Hercegovine za IPA III Program prekogranične saradnje „Srbija – Bosna i Hercegovina“ za period 2021-2027. godine.

Ad.21. Davanje saglasnosti za ratifikaciju Sporazuma o finansiranju za Interreg IV-B IPA Program za dunavsku regiju za period 2021-2027. godina između Evropske unije, Bosne i Hercegovine i Mađarske, broj: 01,02-21-1-1449/24 od 25. 7. 2024.

Predsjedavajući je dao uvodne napomene. Nije bilo rasprave.

Predstavnički dom je, s 33 glasa „za“ (iz Federacije BiH 22, iz Republike Srpske 11), dva „protiv“ i bez glasova „suzdržan“, dao saglasnost za ratifikaciju Sporazuma o finansiranju za Interreg IV-B IPA Program za dunavsku regiju za period 2021-2027. godina između Evropske unije, Bosne i Hercegovine i Mađarske.

Ad. 22. Davanje saglasnosti za ratifikaciju Međunarodnog sporazuma između Evropske unije, s jedne strane, i Bosne i Hercegovine, s druge strane, o učešću Bosne i Hercegovine u programu Unije Digitalna Evropa (2021-2027), broj: 01,02-21-1-1544/24 od 7. 8. 2024.

Predstavnički dom je jednoglasno, s 35 glasova „za“ (iz Federacije BiH 23, iz Republike Srpske 12), dao saglasnost za ratifikaciju Međunarodnog sporazuma između Evropske unije, s jedne strane, i Bosne i Hercegovine, s druge strane, o učešću Bosne i Hercegovine u programu Unije Digitalna Evropa (2021-2027).

Sjednica je završena u 14. 45 sati.

Sastavni dio Zapisnika je transkript 21. sjednice Predstavničkog doma.

SEKRETAR
PREDSTAVNIČKOG DOMA
Dražen Mustapić

PREDSJEDAVAJUĆI
PREDSTAVNIČKOG DOMA
Nebojša Radmanović